

Talmassons

CHIUDI

in tal '800



Sul imprin dal '800, Talmassons al è un dai tancj paîs contadins ch'a son distirâts lunc la Stradalte, la cui storie si somee e il cui mût di vivi nol è cambiât tant tai secui a cause da lis invasions dai tancj esercits, prin francês e dopo austriac, da lis calamitâs naturâls, dal dût lavôr in tai cjamps ch'al no rindeve masse, soledut se si ere mezadris o colonos.

La societât rurâl dal timp, a Talmassons, a je fate di puaris fameis patriarcjâls ch'a scombatin ogni dì par sorevivi e di cualchi proprietari di tjaris o altris abenâs (benestans).

Chej agns di fat, no son biei pal nestri paîs: la cronache a nus ripuarte che tal 1814 a son stadis brutis zulugnadis a primavere noltrade; tal 1815 al plôf in continuazion e il fen si fraidîs; il 1817 al è clamât l'an da la grande fan cun tempieste e grancj sùts. E dopo a son di meti in cont a metât dal secul, li invasions di cavaletis, lis epidemîs fra i nemai e par finî tal 1855, la pestilence ch'a fâs plui di 30 muarts.

I acjadiments plui bruts di chest timp a son la tubercolosi, l'alcolism, ancjemò malarie e pelagre, causade da une alimentazion fate soredut di blave.

La mortalitât infantîl a je une vore alte.

Di front a dutis chestis insigurecis, la parochie e devente un punt di riferiment.


In tal 1821 e ven consacrade la glesie di Sant Luring scomençade plui di 20 agns prime e ca je ancjemò di sei finide dal dut.

Li anadis scjarsis a no metin dongje lis ufiertis dai fedêi e cussì bisugne spietâ ancjemò 20 agns prin che, cun grancj sacrificis si scominçin a piturâ a fresc lis parêts internis par opare di Rocco Pitacco.

Intant, il sentôr di ce ch'a stave sucedint in altris lûcs al rive ancje tal nestri paîs e al fâs sì che Valentino Cossio, al partecipi cun vivôr a la spedizion dai Mil. Altris, in tal Comun, a jentrin a fa part da la guardie civiche e saran protagonisti di combatiments tôr di Palme.

Dopo l'union a l'Italie la situazion no va miôr e cussì la int a scomençe a migrâ viars il centri da l'Europe e agns dopo viars lis Americhis.

Plui di cualchi nestri bisnono al è fra chei.



Pacifico Valussi

Pacifico Valussi al è nât a Talmassons tal 1813 e al à vivût come omp pulitic, ma soiredut come gjornalist a Triest, Vignesie, Milan e Udin, dulà che a si ferme par simpri in tal 1866.

Ancje se si è laureât in matematiche a Padue, al sielz di fâ il scritôr e al introdûs il gjornalism ta la storie furlane.

Di fat, al è stât fondatôr e colaboratôr di tancj gjornâj impuartans dal Friûl.

Al à passât la sô infanzie in tal nestri paîs, ta la cjase dal pari ch'al ere un piçul proprietari di tiare e ch'al veve colonos e fameis.

In cjase Valussi no si mangjave dome polente come par tante int di chel timp e Pacifico, come ch'al scrîf lui stes, al vîf seren, cence vê bisugne di là a iudâ la famee tal lavôr dai cjamps.

In te cjase paterne, grazie ai insegnaments di un barbe di so pari, ch'al ere predi, e dal plevan locâl al scomençe i prins studis che dopo al fâs plui a font tal liceo di Udin (in che volte dome i fîs di chei che a stevin ben a studiavin, cun leziions in privât o in canoniche).

A la fin dal liceo, al vâ a Padue dulà che si laure in matematiche.
Lì al scomençe a cognossi i problemas dal so timp e al scuvierz il mont da la culture taliane, lis gnovis ideis che a stavin vignint indenant.

Ma al è soiredut a Milan che al è nât il gjornalist Valussi cu la esperienze al gjornâl “La Perseveranza”:

lì al scrîf tant e di dut, soiredut sui problemas di chei agns che lui al cjale cui voi di un sostenitôr dal governo.

Dopo al vâ a direzi un gjornâl a Firenze e finalmentri tal 1866 al torne a Udin e al fonde il “Giornale di Udine” che al sarà la sô plui impuartante esperienze gjornalistiche.

In chel an al devente ancje deputât al parlament talian, cariche ch'al ten fin tal 1874.

Ma al è il gjornalism la sô vere passion e come gjornalist al è stât un dai prins e dai plui autorevui.

Al môr a Udin tal 1893.

Sul mûr da la sô cjase nadâl a je une lapide ch'a lu ricuarde

